

每週經課朗誦經文(巴克禮台語漢字)2013/10/20

共同經課 - 1 耶利米書三十一章二十七節~三十四節

27 耶和華講：「看啊，日子欲到，我欲互以色列家及猶大家，人及精性攏傳種。28 我早前怎樣專心將 in 拔出、拆毀、摔倒、滅無、困苦，亦欲照按呢專心將 in 建立、栽種。這是耶和華講的。29 當許個日，人無閣講：老父食酸的葡萄，子的嘴齒酸軟。30 逐人欲因為家己的罪來死；見若食酸的葡萄者，in 的嘴齒欲軟。」31 耶和華講：「看啊，日子欲到，我欲及以色列家、猶大家立新的約，32 嘅是照我及 in 的列祖所立的約，佇我牽 in 的手，導 in 出埃及地的時所立的。我雖莽做 in 的丈夫，in 猶原背我的約。這是耶和華講的。」33 耶和華講：「許個日了後，我及以色列家所欲立的約是此個：就是我欲用我的律法下佇 in 的心內，刻佇 in 的心。我欲做 in 的上帝，in 欲做我的百姓。34 in 無閣逐人教示 in 的厝邊，及 in 逐人的兄弟，講：『恁著識耶和華』，因為 in 對大到細攏欲識我。因為我欲赦免 in 的罪過，無閣記得 in 的罪。這是耶和華講的。」

共同經課 - 2 詩篇一百一十九篇九十七節~一百零四節

97 我疼惜你的律法到怎樣啊！我通日靜靜想。98 你的誠命常常及我佇啲，互我比我的對敵卡有智慧。99 我比我攏總的先生卡通達，因為我靜靜想你干證的話。100 我比老人卡明白，因為我守你的教示。101 我禁我的腳一切的歹路無行，互我通守你的話。102 我無偏離你的判斷，因為你有教示我。103 你的話佇我的上脣(kiuⁿ)到佻甜，佇我的嘴比蜜卡甜！104 我對你的教示得著明白，所以我怨恨一切的邪路。

共同經課 - 2 詩篇十九篇

1 [大衛的詩，交互樂官。] 諸個天講起上帝的榮光；穹蒼報揚伊的手所做的。2 此日對彼日發出言語；此暝對彼暝傳出知識。3 無言無語，in 的聲無通聽見。4 in 的準繩遍佇天下，in 的言語到佇地極。上帝佇 in 中間為著日頭安置帳房；5 日頭親像新子婿出伊的房，亦親像猛勇的人歡喜走伊的路。6 伊對天的此旁出，蹺到天的彼旁，無一項物園密，無得著伊的熱氣。7 耶和華的律法齊全，會互人的心神活起來；耶和華的干證確實，會互人有智慧。8 耶和華的教示正直，會互人的心歡喜；耶和華的命令清潔，會互人的目矚光明。9 敬畏耶和華的道理是清氣，永遠存在；耶和華的判斷真實，一概是公義 10 ——比金，比多多好金卡通欣慕；比蜜，比蜂房滴落來的蜜卡甜。11 閣你的奴僕對諸個受警戒，守諸個有大賞賜。12 是誰會知伊的失錯啊？求你除去我暗靜的過失。13 求你阻止你的奴僕無故意犯罪，毋准彼個罪惡管轄我，我就完全，免犯大罪。14 耶和華——我的石磬，救贖我的主啊，願我的嘴所講的、心所想的佇你的面前得著接納。

共同經課 - 3 提摩太後書三章十四節~四章五節

14 若是你著長長住佇所學習，所深信許個事，因為知是對甚麼人學的，15 也知你對細漢已經識許個聖冊，就是會互你有智慧，對信基督耶穌來得著救的。16 見若互上帝默示的經，也有利益佇教示、佇督責、互人歸正、引導人學義理，17 互服事上帝的人練達，便便來行攏總的好事。1 我佇上帝的面前，及欲審判活人死人的基督耶穌的面前，為著伊的顯現及伊的閣來，吩咐你：2 著傳道理，無論得時不得時，著專務伊；用百般的寬容、教示、來責備、警戒、勸勉。3 因為時日欲到，人欲毋容允端正的教示，欲耳孔癢，愛聽多多先生，照家己的私慾，4 閣越頭毋聽真理，去向無影的話。5 獨獨你凡事著節制，忍受艱苦，行傳福音者的工，來盡你的職份。

共同經課 - 4 路加福音十八章一節~八節

1 耶穌設一個譬喻，教示 in 著常常祈禱，2 毋通厭。講：「某城有一個審判官，無驚上帝，也無對重人。3 佇彼個城內有一個守寡人，沓沓去見伊，講：『有人及我做對敵，求你替我伸冤。』4 伊久久無欲，後來想講：『我雖然無驚上帝，無對重人，5 若是因為此個守寡人沓沓來攪擾，我欲替伊伸冤，免得伊永永來苦楚我！』」6 主閣講：「恁著聽此個不義的官所講的。7 何況上帝揀的百姓暝日喉叫伊，伊也為著 in 寬容，豈無欲替 in 伸冤嗎？8 我給恁講，伊欲緊緊替 in 伸冤。雖然按呢，人子到的時，豈欲抵著世間有信嗎？」